

TA'LIM SOHASIDA YANGI YO'NALISH - MEHRLI MAKTAB

Baxieva Manzura Mirzabaevna

*“Mehrlı maktab” davlat ta'lim muassasasi
Qoraqalpog'iston Respublikasi filiali tarbiyachisi*

Shiddat bilan rivojlanib borayotgan yangi O'zbekistonimizda endi har yili yoki har oyda emas, balki har kuni va har soatda yangi o'zgarishlar, har bir sohada yangi burilishlar sodir bo'layotganiga biroz moslashib ham qoldik. Bugun farzandlarimizga shunday ta'lim va tarbiya berishimiz kerakki, bola har qanday sharoitda ham zamonaviy ta'lim va texnologiyalar asosida ta'lim olib, rivojlanishdan orqada qolib ketmasligi o'ta muhimdir.

Vazirlar Mahkamasining 2022-yil 5-maydagi 234-son qarori bilan Respublika bolalar gematologiya, onkologiya, klinik immunologiya markazida davolanayotgan bolalarga maktabgacha ta'lim va tarbiya hamda umumiy o'rta ta'lim berish maqsadida “Mehrlı maktab” davlat ta'lim muassasasi tashkil etildi. Maktab tashkil etilishi bilan yangi – gospital pedagogika sohasi ham boshqa ta'lim sohalari qatorida o'z faoliyatini boshladi.

Ushbu markazda uzoq muddat davolanayotgan mehrga muhtoj bolajonlarimiz endilikda mehr bilan ta'limni-tarbiyani birgalikda olishga muvaffaq bo'lmoqda. Mehrlı maktabning asosiy maqsadi-davolanayotgan bolalarning ijtimoiy hayotga moslashishi, ularning keyingi ta'lim muassasalarida ta'limni davom ettirishga tayyorligini ta'minlash, va asosiysi, bolalar hayoti va sog'ligi muhofazasini ta'minlashdan iborat. Bu yerda faoliyat olib boradigan pedagog xodimlardan tabassum to'la iliq yuzlar, mehr to'la qalblar, iroda, sabr-bardosh, e'tibor va ozgina harakat talab qilinadi.

Mehrlı maktabimizda 2 turdagi maktabgacha ta'lim guruhleri faoliyat ko'rsatadi.

1.Maktabgacha ta'lim gospital guruhleri- 2 yoshdan 7 yoshgacha bo'lgan bolalar uchun tashkil etiladigan guruhlar.

2.Ilk rivojlanish yoshidagi bolalarga mo'ljallangan o'yin guruhleri-1,5 yoshdan 2 yoshgacha bo'lgan bolalar uchun tashkil etiladigan guruhlar.

Bu yerda maktabgacha yoshdagi bolalarga ta'lim-tarbiya jarayoni mazmuni Maktabgacha va maktab ta'limi vazirligi tamonidan tasdiqlangan “Ilk qadam” davlat o'quv dasturi asosida ishlab chiqilgan dastur bilan, ilk va maktabgacha yoshdagi bolalar rivojlanishiga qo'yiladigan davlat talablariga muvofiq belgilanadi. Davolanayotgan bolalarni maktabgacha gospital guruhlariga qabul qilish esa Mehrlı maktab tomonidan taqdim etiladigan ro'yxatlar asosida amalga oshiriladi. E'tiborga molik jihati, sog'ligi tufayli guruhga chiqa olmaydigan bolalar uchun xonalarda individual ta'lim berish yo'lga qo'yilgan bo'lib bolalarning individual xususiyatlarini hisobga olgan holda tashkil etiladi.

Men uchun eng quvonarlisi 2023-yil 1-iyundan Mehrli maktab davlat ta'lim muassasasining bir filiali bizning Qoraqalpog'iston Respublikasida Qoraqalpoq medicina instituti binosida bolalar onkogematologiya bo'limida tashkil etilgani bo'ldi. Nimasi bilan quvonarli, chunki bu yerda davolanayotgan har bir mitti qalb egalari va ularning ota-onalari uchun bu katta motivaciya. Chunki har bir ota-ona uchun bolasining sog'ligi, quvonchi, tabassumi barcha qolgan narsalardan ustundir.

Men aynan shu maktabda maktabgacha ta'lim guruhida faoliyat yuritayotganimdan, bu yerdagi bolajonlarning kayfiyatlarini ko'tarishda, qiziqishlarini yanada rivojlantirishda, ota-onalarning farzandlariga dalda bo'lishiga yordam bera oladigan psixologik tavsiyalar berishda, asosiysi bolajonlar salomatligi yaxshilanishiga ozgina o'z hissamni qo'shayotganimdan qalbim har doim taskin topadi. Mashoiqlarimiz ham aytgan edi: "Savobli ishni har kim har kuni qilish kerak".....

Foydalanilgan adabiyotlar:

Vazirlar Mahkamasining 2022-yil 5-maydagi 234-sonli qarori
"Ilk qadam" davlat o'quv dasturi